

أحلام إنسان بسيط

شعر بالعامية المصريه

أحمد رشاد أغا

دراسة و تقديم
دكتور يسرى العزب

إهداء

إلى روح أمي التي ربتني
و علمتني الحكمة
إلى روح والدي الذي رباني
على الحب و التسامح
إلى كل ما أحمله داخل قلبي
من حب فياض
إلى الأخوات
الأولاد
الأصدقاء
أعز الولد ... الأحفاد

مع تحيات / احمد رشاد

قراءة نقدية فى ديوان

(أحلام إنسان بسيط)
بقلم الدكتور :

يسرى العزب

أحمد رشاد أغا دائماً زجال متميز .. يكتب و يطبع
قصائده و ينشدها في الندوات و الأمسيات منذ ربع
قرن مضى أصدر حتى اليوم بعضاً من دواوينه هي :
السويس في عيوني - ياما في الجراب
الناس جرالها أيه ؟

و في أزجاله يرى القارئ صورة الواقع في المدينة
(السويس) نابضة بالحياة .. لكنها حياة قاسية
تتغلب السخرية الموظفة فنياً على قسوتها .. في لغته
خفة دم تجعلها تتمتع بدرجة عالية من البساطة
و الرشاقة و تندفع بها الرؤية الصافية إلى قلوب
المستمعين أولاً و القراء ثانياً في سلاسة و انسياب .
و يأتي ديوانه الجديد (أحلام إنسان بسيط) في
أسلوبه امتداد حميم لهذه الجذور الفنية ..
السخرية و البساطة و الرشاقة و الرؤية الصادقة ..

نراها شظايا موزعة على نصوصه تسعة و العشرين ..
و مجمعة فى بعضها و هذا اكتساب جديد ملموس
سنقف أمامه بعد .. يبدأ الديوان بالعتاب مع صديق
ندل لم يكشف الشاعر نزعة الندالة عنده إلا في
المحنة :

أخذته صاحبي
و كان القلب صافى
مخلص قوى و وافي
ما صاننش العيش و الملح
زود فى قلبى الجرح
و لما المرض اشتد
قلت هبيجى يمد
اتاريه خسيس و جبان
و سابنى للنسيان

و هي بساطة في الأسلوب استمدتها لغة الزجل من
إنسان هذا الوطن الطيب البسيط .. بله الذي يرى ..
من الخارج - بسيطاً ، لكن داخله العميق يحمل
تركيباً للشخصية .. يجعله أذكى الناس و أوعاهم ..
هي بساطة الطيب المتسامح المسالم الصابر .. المنتظر
و هي سخرية ابن البلد العارف الذي لا يظهر درايته
إلا في اللحظة المناسبة كما نرى في قصيدة (خايف)
حيث يقول ساخرا من المحبين الجدد :

الحقنا تعال يا روميو

فرضوا ع الحب ضرايب

انشكوا ف عينهم عميوا

لا سابوا لنا واد و لا شايب

سرقوا الحب و أفراحه

و جابوا لنا بداله أحزان

و القلب ان طار بجناحه

بيبات الليل سهران

هو زمن غريب يعيش شبابه الجديد بالفهلوة التي
تحلل له النشل و السرقة بدءا من ورق الكوتشينة
حين يشترك في اللعب و انتهاء بأسمى و أنبل
العواطف حين يحب . و في هذا الزمن الغريب يسيطر
الخوف على الطيبين من حاضر فارق الفرح أهله و لم
يعد حتى (يدق الباب) و من مستقبل يتوقع المرء كل
شئ فيه قبل وقوعه :

خايف من بكره و بعده

يفرضوا ع البسمة ضريبة

و يتوه الحلم و سعده

في بلاد ع القلب غريبة

لكن الخوف الذي لا يحتمل هو ما نراه في آخر

رباعية من هذا النص الذي يتكون من سبع وحدات
رباعية : وهو خوف الكلمة الذي يجعلها عاجزة عن
قول الحق .. و ما أقساه من شعور على من يداوى
جراح نفسه بالشعر / الكلمة الصادقة المنطلقة
بالحقيقة كاشفة كل ألوان الزيف التي تحاول طمسها
.. يقول الشاعر :

خايف .. لا الكلمة تخاف

تسكت ما تقولش الحق

تسرق منى المجداف

تاخده و ترميه فى الشق

و من الخوف .. الذي تلا العتاب – إلى حالات من

التدهور الإنساني تصل إلى حد التغير البيولوجى الذي

يتحول فيه الإنسان إلى اضعف الكائنات (الأرنب) :

بعد ما كنا سباع و وحوش

أتأرنبنا جوه الغابة

خلق يا الله يا عم و حوش

دا احنا وقعنا فى وسط دياهه ..

و الحقيقة التاريخية أننا لم نقع في وسط الذئاب ..

لأننا مقيمون منذ فجر التاريخ هنا .. في أرضنا ..

لكننا تساهلنا فمنحنا الذئاب الغرباء صك الإقامة

عليها . فتمكنوا باستسلامنا من فرض المقلوب علينا

فصدقنا أننا (وقعنا في وسط دياهه) وهذا صحيح –

فنياً – فكيف يتصور الأرنب أن الدار داره ؟ .. وأن

الأرض أرضه ؟

و إذا كان المواطن الإنسان قد (تأرنب)

فماذا يكون حلمه .. يجيب أحمد رشاد أغا في

(أحلام عبيط) سيكون حلمه أن تعود إليه أبسط

حقوق الإنسان .. أقلها .. يستقوى بها وهو يبدأ من

جديد .. رحلته التي يعود منها - من جديد - إنساناً
و لن (ينعدل) الحال إلا بهذه (الأنسنة) التي تبدأ
من أبسط الأشياء ..

باحلم بببيت و يكون له أساس
و احلم بباب و مالوش ترباس
و احلم بحب الناس للناس
علشان أنا إنسان بسيط

و إذا كانت (الأرنبة) هي مصير المتخاذلين
فإن (الحمورية) - بالعقل المبدع - تكون في مرتبة
أرقى من الإنسانية التي (تأرنبت) و لنقرأ قصيدة
(مين الحمار ؟) التي تبدأ باعتراض الحمار على أكل
الفول و نجاحه في الاستغناء عنه حيث استولى
عليه من كانوا آدميين .. في هذا النص تصوير جيد
الفروق التي تفصل بين الجنسين (الإنسان و الحيوان)

طول عمرى بانھق على راحتى
و طول عمره زعيقه بحساب
و ان غمى عينى راح أخطى
و حاقول له يا ابن الكداب
بردعتى فوق ضهرى راميهـا
و فى عز البرد مدفيها
خليها و يمكن تلاقيها
على قدك و نكون أصحاب
ترى .. أيهما تختار .. (الارنبه) أم
(الحمورية) ؟ جازاك الله أيها المواطن (العقر) لا
(البسيط) .. أيها الشاعر (الأذكى) لا (العبيط) ..
و يجيب أحمد رشاد أغا موضحاً المزيد من الفروق
دا انا عود برسيم بيشبعنى
و حفان التبن .. يكفينى

صدقنى يا صاحبى و اسمعنى

أرجوك من فضلك تنادينى

بعلو الصوت قل لى : يا حمار

و شاور بديك اختار

اكتب لى بايدك اشعار

أبيات بتنهق فى سنينى

القناعة التي كانت - و لم تعد - كنزا ينفع

(الإنسان) .. ما زالت أساساً يعيش به (الحمار)

الذي تتصاعد إنسانيته دراميا مع نهاية القصيدة إلى

الحد الذي تنهار فيه الحواجز تماما فلا ندري من

الحمار في قول الشاعر بعلو الصوت قل لى : يا حمار

هل المنادى هو الحمار الذي ظل حماراً ؟ أم الإنسان

الذي تخلق عن إنسانيته ليصبح حماراً .. ؟!

و أداة الإشارة / اللغة الجديدة في نهاية النص

و هي (الذيل) لمن منهما للمُنَادِى أم للمُنَادِى ؟ !
و هل يملك أي منهما حق الاختيار ؟ لكنها الحياة ..
رغم مرارتها .. تبقى بالسخرية .. حلوة .. شهية ..
قابلة للحفاظ عليها .. حباً في البقاء ..
و علينا - مع رؤية الشاعر الواعية .. الصادقة - أن
نحبها رغم مرارتها و علينا نحن الشعراء أن نحليها
بإبداعنا حتى ولو كان - على حد قول
الشاعر (نهيقاً) فهو أفضل كثيراً من الخرس :

اكتب لى بإيدك اشعار

ابيات بتنهق فى سنيى

و بمثل هذا الشعر .. تتغير الحياة - بالفعل -
إلى الأجل .. و هكذا .. على هذا المنوال تستمر قصائد
احمد رشاد أغا .. مشكلة بالزجل الجميل حال الواقع
الاجتماعي و الذاتي الذي نعيشه في عصرنا الفنتازى

عصر (الفيديو كليب) الذي شاهدنا فيه جميعاً أبشع
مسرحية كوميدية تمت بتأليف و إخراج و بطولة
أمريكية في (سجن أبو غريب) بالعراق الشقيق
و اعتذر للشاعر فأعيد له عنوانه غير الدال الذي
اختاره لقصيدته الدرامية (مسرح أبو حبيب) .

و له تحياتي و تقديري

د. يسرى العزب

الجيزة في ١٥ مايو

صاحبی

لما كان بيحبى
جرىته عليه
خدت بإيديه
دراعى اليمين سنده
و الشمال ساعده
و أخذته صاحبه
و كان القلب صافى
مخلص قوى و وافى
ما صانش العيش و الملح
زود فى قلبى الجرح
و لما المرض اشتد
قلت هيجى يمد
أتاريه خسيس و جبان

و سابنى للنسيان

حبه .. حبه

اشتد عوده ... فاق حدوده

وف أول فرصه

كان القلم ع الخد .



خایف

إلحقنا تعالى يا روميو
فرضوا ع الحب ضرايب
انشكوا فى عينهم عميو
لا سابوا لنا واد و لا شايب

* * *

سرقوا الحب و أفراحه
و جابوا لنا بداله احزان
و القلب ان طار بجناحه
بيبات الليل سهران

* * *

الناس الفرع فارقه
ما رجعش يدق الباب
و تملئ اللى بيقلقها

الفرقه من الأحباب

* * *

خايف من بكره و بعده

يفرضوا ع البسمه ضريبه

و يتوه الحلم و سعده

فى بلاد ع القلب غريبه

* * *

خايف لا الليل دا يطول

ما يجيش من بعده صباح

الآخر يطلع أول

و الفرع يلاقى جراح

* * *

خايف لا الغول يحضننى

يرمينى من ع السور
يقول لى لو حتخوننى
حارميك فى قرار مسحور

* * *

خايف لا الكلمه تخاف
تسكت ما تقولش الحق
تسرق منى المجداف
تاخده و ترميه فى الشق

الطف بيننا

الطف بينا يارب و نجى
قبل طوفان الظلم ما ييجى
إصحى يا عربى اعلنها تحدى
يا لله بسرعه قوام خد ايدى

* * *

الواد شرشر ماله اتمطع
طايح فينا و سايق العافية
طالع نازل - فينا يقطع
و احنا سلاحنا شعر و قافية

* * *

مزع جامد كدا و براحتك
ما احنا خلاص ما بقاش لينا قيمة
انت عاجبنى قوى بصراحتك

واحننا يا واد أبطال فى السيمما

* * *

مؤتمرات وكتير قرارات

والقعدات آخرتها فاشوش

بصله و تومه مع كرات

إملى يا أمة و عبنى كروش

* * *

بعد ما كنا سباع و وحوش

إتأرنبنا جوه الغابة

حلق يا لله ياعم و حوش

دا احننا وقعنا ف وسط دياهه

* * *

النيل أصبح ميته مالحه

حتى جريد النخل اتقطم
لما نوبنا و قلنا مصالحه
طفش الحلم يا ناس و اتحطم

* * *

لا النيل حيطاطى لطمعكم
ولا حتى فرات البابلية
و ان شجر الغرقد بقى معكم
راح يصبح وياكو ضحيه

امانی

نفسى اشوف الدنيا جميلة
أوتارها تعزف فى كل ليله
غنوة حلوة و نسمة عليلة
و شبابنا اخلاقه حميدة

* * *

أملى القى فى بيتنا محبه
إبنى و بنتى يعيشوا أحبه
حبنا يكبر حبه ف حبه
راح نكبر و العيله سعيده

* * *

أملى القى فى بيت العيله
شمعه و قايده ف كل ليله
كله يساعد عند الشيله

و كبيرنا احتراماته أكيدة

* * *

أملى افتح مره جريدة

اقراها و اشوفها مفيدة

مانشيتات مواضيعها عديده

و الوكالات انباءها جديدة

* * *

نفسى ما اشوفشى ف بلدى ضرير

و لا حد بياكل حق الغير

و عجل إنتاجنا بيسير

و طموحات عمالنا فريدة

* * *

أملى يعيش الكون فى سلام

حبه یرفرف یرقی دوام
و نعیش سعدا طول العام
افراحنا و اعیادنا مجیده

أحلام إنسان بسيط

باحلم بهدمه تدفینی
و احلم بلقمه تکفینی
و احلم بمیه تروینی
مش باحلم بجاموسه و غیط

* * *

باحلم بوابور طحین ما یعطلشی
و احلم بعجین العیش ما یخلصشی
و احلم بطفل یشب ما یقعشی
یکبر یلاقی له مدرس نشیط

* * *

باحلم ببیت و یکون له اساس
و احلم بباب و مالوش ترباس
و احلم بحب الناس للناس

علشان أنا إنسان بسيط

* * *

باحلم برجوع الحق للمظلوم

و احلم بشمس ما تغرب يوم

و العيشه تفرحنا يا ناس و تدوم

لا فيه مساومه و لا تربيط



کعب دایر

لفينا كثير و تعبنا
لحد ما دبنا ما تبنا
لقينا الحزن نصيبنا
خدعونا كثير احباب

* * *

و عرفنا قلوب و بتحلف
و بتوعد ياما و تخلف
و البحر بموجه بيحذف
الحلو ف بطن عذاب

* * *

و قابلنا قلوب عطشانه
و ف برد الشتا حرانه
شايله حملوها و حزنانه

و قافله وراها الباب

* * *

و عرفنا عن المكتوب

غالب او كان مغلوب

من نظرة عين محبوب

ترجع من تانى شباب

* * *

و سهرنا الليل ع القمره

و عشقنا رموشه السمره

و برغم حلاوة السهره

لقينا الحب سراب

* * *

فتشنا جوه زكايب

و شفنا ياما عجائب
لقينا الحق غايب
و الباطل بس .. صواب

* * *

لفينا رجعنا تانى
عدينا كتير موانى
ضيعنا سنين فى أمانى
و الحق طلع كذاب

ع الكورنيش

الشمس كانت ناويه تروح
لامه شعورها كده بدلال
جاها الليل عاشق يتطوح
يرمى الغنوه مع الموال

* * *

قمر الليل دا صاحبنا يا خال
ياما كتير قال لنا ازجال
ع اللي يا عيني يبات سهران
يشكى عذابه و مُر الحال

* * *

ع الكورنيش الهوا جمعنا
كان له طعم و كان له معنى
لما يشوف حلاوتنا يدوب

جوه الدنيا اللى بتسمعنا

* * *

ع الكورنيش الصحبه رفاقه

وقت الحب الروح تتلاقى

نرقص و يا النسمة الحلوه

اللى بتضحك و بتتشاقى

* * *

ع الكورنيش فى عيون تتقابل

نلقى قلوبنا الصافيه تغازل

و ساعات تبقى كثير حيرانه

لما يصادف شوقها عوازل

* * *

و ساعات نلقى شباب مش واعى

يمشى يعاكس من غير داعى
جيت كلمته .. بحب عاتبته
مش لو أختك كنت تراعى

* * *

ع الكورنيش انا شفت عجوز
يترقص .. زى الأراجوز
رايح جاى ورا الستات
اتزحلق على قشرة موز

* * *

قمنا ضحكنا عليه بشويش
تاخذ غيرها يابو درويش
صدقنى يا صاحبي و اتمتع
قعه حلوه ع الكورنيش

مين الحمار .. ؟

طقطق ودانك و اسمعنى
يا حمارى يا اللى انت فاهمنى
إمتى الإنسان راح يتبعنى
و يقرب منى ... يكلمنى
و يحكى معاى ... و يقول
و ندور على اى حلول
تمنعنى من أكل الفول
من غير ما يفكر يظلمنى

* * *

طول عمرى بانهق على راحتى
و طول عمره زعيقه - بحساب
و ان غمى عينى راح أخطى
و حاقول له يا ابن الكداب

بردعتى فوق ضهرى راميهـا

و ف عز البرد .. مدفيها

خليها .. و يمكن تلاقيها

على قدك و نكون أصحاب

* * *

بتنادى علىّ تقول شى

و تشد الحبل تقول يسّ

دا الصعب باخطى و امشيـه

و اتألم زيـك وياحس

و علىّ بتسوق جبروتك

مع إنى ماكلتش يوم قوتك

و انا صوتى ساكن فى سكوتك

و دموعك فى العين بتمس

صدقنى يا صاحبى و اسمعنى
أرجوك من فضلك تنادينى
بعلو الصوت قل لى : يا حمار
و شاور لى بديك أختار
اكتب لى بإيدك أشعار
أبيات بتنهق فى سنينى

أَهْلُ بَنَائِب دَايِرَتْنَا

اهلاً بنايب دايرتنا
فى الحى حتعلا به رايتنا
راح ينجح و تزيد فرحتنا
و بكرة حيفقع مرارتنا
بوعود معسوله و امانى

* * *

خفة دمه مش على حدّ
كان بالخطوه إلينا يمدّ
يزورنا دايما جمعه و حدّ
و لما يشوفنا يبوس الخدّ
و لا يهرب و لا يبقى أنانى

* * *

بيقول معاى عصا موسى

فى المجلس طلبى عليه بوسه

لا عندى باميه و لا كوسه

و لا هم تشيلوا و لا حوسه

و حتسمعوا أحلى أغانى

* * *

مكتبى مفتوح لخدمتكو

و حاحل دايما مشاكلكو

و رايح اشارك فى اعيادكو

و فى المشاكل خدامكو

و لا حد فيكو حيعانى

* * *

ياما قعدت معاكو أدادى

حتى عزولى أقول له يا دادى

ما خلاص منكم خدت مرادی

و ظفت العيله و أولادی

و العیشه حلوه و عجبانی

* * *

و قعدت معاکو فی قهاوی

أسامرکو و بأی حکاوی

و بقلبی أنا کنت ناوی

دلوقتی أصبحتو بلاوی

و لا طایق أشوفکم من تانی

ساعة الأذان

قبل الأذان الديك بيصحي
و يشجينا علامه بالفصحي
يا ابن آدم يا الله إسعى
صلى ع النبي العدنان

* * *

الدنيا تفتح قلبها
و الصدر ينشرح لها
و الناس بتشكر ربها
وقت الصلاة .. ساعة الأذان

* * *

لما الشفايف بتكبر
ريحتها دى مسك و عنبر
و الصوت بيعلا الله اكبر

إيمان و يبهز الوجدان

* * *

لما السما تنور للكون

لكل شكل و كل لون

يأمر ربى كن فيكون

و الكل بيطيع الديان

* * *

و الغصن بيميل ع الشجر

و الورد فتح قه شكر

و النجمه ضحكت للقمر

و الزرع يسجد فى الغيطان

* * *

البحر يفرش سجاده

و الموجه تجرى بسعاده

الله عليها دى عباده

آيات و نزلت فى القران

* * *

لما الدموع تنزل بخشوع

تلقى الحنين له صوت مسموع

يطمن القلب الموجد

طالب من الرب الغفران

* * *

هز الهلال يا بلال صحيننا

من العطش يا الله اروينا

سيف العروبه معانا زينه

و تاريخه أصبح فى خبر كان

ملحمة بلدنا

عزفت سويسنا الملحمه
أكبر قصيدة ملهمه
و الشعب نصب المحكمه
دى أرضنا و غاليه على

* * *

الضرب زاد ولعها نار
هدموا المصانع و الديار
و لا همنا طول الحصار
أولادنا همهمه الفدائيه

* * *

على كل غاصب كل دخيل
و كان بإيدنا ألف دليل
و عدونا قدامنا ذليل

مع كل طلعه انتحاريه

* * *

أعدائنا لما هاجموكي

و بطيارتهم ضربوكي

إتبرجلوا لما شافوكي

شعله حماسه ووطنيه

* * *

أبطالك لما قادوها نيران

قناوى و معاه ميمى سرحان

مع البشتلى و سليمان

طير رقاب اسرائيليه

* * *

غريب و أشرف فدائيين

عواد و طه و حافظ أمين
منعم .. أبو هاشم نصبوا كمين
فى الأربعين و الزيتية

* * *

حافظ سلامه قائد جامع
جيش و يا شرطه فى الجامع
شعب السويس ابو سيف لامع
رافض يسلم البندقية

* * *

سويس بلدنا رمز الكفاح
طول عمرها شايله السلاح
ربان سفينه أو ملاح
فى الحرب نضرب أغنيه

رجالنا تسلم أياديهم
قلوبهم صاحبه عينيهم
و أرضهم رجعت ليهم
آدى الشباب السويسيه

* * *

دم الشهيد روى سينا
نبّت خضاره امانينا
روحه ترفرف حوالينا
و جاب لنا النصر هديه



مسرح أبو غريب

الخلفيه : قضبان — جماجم مرسوم عليها سهم خطر
سيناريو : وحشيه و تعذيب
آسف دا هزار الحبيب
كلا كيت أول مرة
مخرج بيلف بكاميرا
بيصور من قُرب
ضحكه من القلب
بتفتح شريان الهموم
نبضها بكا و سموم
تجاعيد وش الممثل طبيعيه
متمكن من الدور
يبكى .. يضحك فى نفس واحد
يقلع — يوطى متعصبه عينيه

مربوطه إيديه
مُلَقْن بيمليه باقى الحوار
إهانته - مهانته - تنطفئ الأنوار
كرباج فى إيدى حمار
ممثله متسلسله - يتحرش بيها الكلاب
دراما مؤثره - ولاده متعثره
كل دور فى المسرح مُباح
تسمع صوت نباح - وراه صراخ

(٢)

مؤلف الروايه نشوان
جمهور المسرح توهان
سكوت - كلاكيت - تانى مره

مسرح تراجيديا ناموا

دوبلير بيمثل حريه

❖ ❖ ❖

ينطفى النور تتبدل الشخصيه

جمهور عارف و ساكت

خايف م التمساح

اللى باين ع الشاشه

ليدخله التخشيبه

عيون قريبه

نظرات غريبه

الكل غرقان

مركب بلا مجداف

الدفه عطلانه

قبطان يهرب منه الضمان
البحريه قلقانين
المرسى قدامهم بعيد
و الهلب مرمى ع الشط
هربان من بطن المراكب
ينده ع اللى راكب
ريس البحريه ايده على خده
تايه مع الشمس
اللى بتغيب حبه حبه
تنزل الستاره .. تبدأ الروايه



حلوا يا حلوا

حلى قطايف و يا خشاف
إملا كرشك و اوعى تخاف
أهل البوسنه زمانهم راح
نام و اتغطى و شد لحاف

* * *

انسى كمان الأخ شيشان
لا تقول مسلم و لا إنسان
كبر مُحك - رقصَ وسطك
لاجل الخطوه تلقى مكان

* * *

و الكوتشينه طلعت بصره
هدموا الموصل و يا البصره
حلفوا يخلوا الزرع ما تطلع

و الأحرار أخذوهم أسرى
إحنا بقى لنا كتير ع الحال دا
طوح فينا الغرب وودا
و اتخندقنا جوه سريرنا
و اللى ناقصنا لحاف و مخده

* * *

قيدوا شموعكوا و طفوا التورته
إغلوا الزبده و حلوا بمورته
أهل الغرب يا عينى علينا
ليلة الزفه — دبحوا القطه

* * *

قرب بص يا عربى يا اخينا
الأحلام فى قلوبنا سجينه

خايفه تطل من الشباك
تلقى الخيبه دايره فوقينا

* * *

خيبة وطنى حبيبى الأكبر
اللى ما سمى يوم ولا كبر
فى فلسطين و جولان و عراق
مين هيصون الأخ الأصغر ؟!

* * *

إصحى يا وطنى و صحى النوم
إفرد طولك يا الله و قوم
دا احنا الساده فوق الأرض
و هم كلاب من أول يوم
حلوا يا - حلوا
يا عرب حلوا

فوانيس رمضان

فوانيس رمضان بتقول وحوى
و بتنطق أزجال ... بالنحوى
أجمل أنغام - ولا فى الأحلام
بتنور قبلى - وف بحرى

* * *

يا فانوس فكرنا بليالينا
فكرنا بلمة ... أهالينا
و بصحبة جارنا تعود لينا
تبقى انت صحيح يا فانوس سحرى

* * *

فوانيس فى إيدين صبيان و بنات
الفرحه بتضحك ... حلويات
ياميش و قطايف مع شربات

و حنسقى حبايىبى يوم فرحى

* * *

نفرش مناديل و يا القناديل

و نغنى نقول نور يا جميل

و ننادى عليك يا فانوس يا أصيل

و نلف معاك قبلى و بحرى



إِحقننا يا جدو

إلحقنا قوام يا الله يا جدو

إحنا أولاد سيد عبده

جايين نتشكى و شكوتنا

تليفونا بيغلا و فاتورتنا

الضغط ركب بابا و هدّه

* * *

تليفونا عادى ماهوش زيرو

لا طلبنا مسابقه ف ماسبيرو

موبايلنا حتى .. مانعينه

و بندعى لبابا .. الله يعينه

سلك التليفون قطعه و شدّه

* * *

جوه فاتوره رقمها خيال

نمره غريبه و مش ع البال

قلنا لعمو .. دى حقيقه

فاتورتنا ليه قايده حريقه

دقيقه بدقيقه ... بتعدوا

* * *

طالبين العدل مع الرحمه

دى العيشه بقت همّ و زحمه

و بنسأل و سألنا برئ

مسؤولنا يكون قلبه رقيق

حبل الوداد مش بييمده



يا مراکبي

موال :

يا بحر يا مسافر بلاد و بلاد
شايل فى قلبك زاد مع زواد
واخذ معاك حبيبى .. أنا شوقى فى القلب زاد
أمانه يا موج أمانه .. وصل له مكتوبى
قول لمحبوبى — ساب فى العيون دمعاه
قل له يا مراكبى — دموعنا لسه فى عنينا
يا مراكبى جدف ودينا

* * *

يا مراكبى جدف ودينا
ودينا بسرعه على المينا
سافر حبيبنا ما ودعنا
و ساب دموعنا فى عنينا

عيونه بوصله و قلبه فنار
و الشوق شراع طائر طيار
و موجه بحر من الأسرار
أصداف تنور ليالينا

* * *

بحار شبكنى بسنارته
الليل بطوله و سهرته
شغلنى بحبه و شاغلته
مستنى جواب منه يجينا
يا مراكبى جدف ودينا

مرسال سبقنا لأعلى بحار

عدى الموانى شطوط وانهار

يشكى له حالنا ليل ونهار

أرجع وحقق أمانينا

يا مركبى جدف ودينا



إِلْعَابُ بَعِيدٍ يَا شَاطِرُ

إلعب بعيد يا شاطر
إبعد و روح بعيد
الفن مش خواطر
و لا مكوه من حديد

* * *

الفن له احترامه
طرب بصوت جميل
الكل له مقامه
و معانا الليل يميل

* * *

الفن مش كلام
و لا رقصه و السلام
و الا انت لسه فاكِر

إنك مطرب وحيد

* * *

خليت الفن يعرج

و قال منك يا جاي

الكلمه منه تخرج

تبعد و تقول يا باي

* * *

و بتاع الوشنه بكره

حايقول شريط جديد

و الناس من تاني تكره

تقول دا واد بليد

* * *

نصيحه اسمعها مني

ياريت تروح لكارك
يا اللي البعيد ظالمني
وظلمت أهل دارك

* * *

خلاص خليك في حالك
وشوف لك حد غيرنا
ما تقول لي بس مالك
يابو شيك مالوش رصيد

* * *

إلعب بعيد يا شاطر
إبعد وروح بعيد

أول كدبه

صدقتك من أول كدبه
و ضحكت على و حبيبتك
مش عارف خوف و الا محبه
و ف قلبى اللى شغلته داريتك

* * *

لو دقت الحب و جربته
و انا قلبى لقلبك قربته
و داريت الأشواق يا حبيبى
و ف عمرى و لا مره نسيك

* * *

و بعث لقلبك مراسيل
دقائه برهان و دليل
أشواقى بتصحى الليل

وكتير يا حبيبى استنيتك

* * *

ليه عقلك وياى احتار

سيب قلبك لهواه يختار

لو أشرب فى الحب مرار

مش حاندم علشان حبيتك

صدقتك .. والله .. و حبيتك



خبينى جوه قلبك

خبينى جوه قلبك

قوام و اقفل على

انا قلبى طوع لأمرك

يا حبيبى و نور عينى

* * *

ادخل جواه ما اسألشى

على بعده أنا مقدرشى

* * *

واقفه على عتبة بابك

أرجوك يا حبيبى اسمح لى

روحي و قلبى أحبابك

ياريت قلبك يفتح لى

* * *

ادخل جواه ما أسألش

على بعده أنا مقدرش

* * *

إرسمنى جناح لطيرك

و الف معاك الدنيا

مليش فى الكون دا غيرك

حبيب و يخاف عليّه

* * *

خبينى جوه قلبك

قوام و اقفل على

ادخل جواه ما أسألش

على بعده أنا مقدرش



ضريبة جزاء

ضربة جزاء شاطها صحيحه
دخلت كده جنب شمالى
جيت بعدها خدت طريقه
قلبت لى قلبى مع حالى

* * *

جاه وادانى ميعاد و اتنين
جبت له فرقه مع الحكام
رقص فى شمال و يمين
قام شنكلنى فى الأحلام

* * *

جيت على خط النص اتسنتر
شطت الكوره قوام بشمالى
شفت ساعتها حته منظر

رد القلب و قال انا مالى

* * *

إيه خلانى ألف و ادور
و اعمل فرود جوه الملعب
و اطلع كده بجناح مكسور
و احلف تانى ما افكر ألعب

* * *

قلبي خلاص أهو رفع الرايه
حامل ماتش ياناس تكريم
أصل حبيبي عملها معاي
إعتزل الملعب و التحكيم



أحبك كده

١٠٠

أحبك كده و أحبك كدا
ما حبش ليه و انا متأكده
حبيبى مناى حتبقى معاى
و تسأل قلبى يقول لك كدا

* * *

أحبك قمرى نهارى و ليلى
و احبك شمسى عفيه و نيلى
و احبك ضلى .. و روحى .. و دليلى
ولا أحب غيرك من ده و ده

* * *

احبك تسكن فى قلبى ضلوعى
و تمسح لى حزنى و حرقه دموعى
و احبك مزاهر تقيد لى شموعى

و تملأ حياتنا سعادة و رضا
أحبك كده و أحبك كدا

الوداع يا فارس العزه

مهداه الى المرحوم :

فاوى الشريف

جرس المحطه ضرب
لبي نداه الحبيب
قطر الغياب اتفرض
قدر بسرعه يصيب
داس على قلبي و هرب
و خدّ معاه الحبيب
إزاي أقدر اتحمل ؟
فراقه لما يغيب

* * *

مين اللي قال (فاوى) مات ؟!
و لا عمره مات ...
دا سيفه لسه فى الدروب ضاوى
راكب حصانه الشريف
يقطع رقاب الفساد

يلهب حماس العرب
وراه خيول العزه
والهمه شاده الحيل
بس كان ليه عتاب
ليه يا عرب تهنا الطريق
والجين سبناه فى البدن
لما دفن روح الفريق
كلماته صدق و إحساس
بنات الحور بيهما تتحنى
أرغول و ربابه
معاها غنى
أحلى موال لمصر اتمنى
مين اللى قال ؟
فاوى مات

يا عم فاوى قم و داوى
قلوبنا من حزنها ماتت عليك
يا عم فاوى — لما انت ع السفر ناوى
ليه تخلينا نتمسك بيبك
يا عم فاوى — لما انت غاوى الغناوى
ليه تشدنا ليك — حرام عليك
جرحت قلوبنا بالقوى
حلفتك بربى و النبى
تجى لنا فى الحلم تزورنا
تخفف مواجعنا
لاجل ما نطل نلاقى ضحككتك
مطبوعه ع الشفايف
تونس جنتك

يارب العالمين

يارب العالمين
تنجى المؤمنين
من إيد الظالمين
و المدعى الكذاب

* * *

طول عمرنا عايشين
أقباط مع مسلمين
بنحب كل دين
إخوه قوى و أحباب

* * *

إسلامنا ماهوش عداء
إسلامنا الدوا للداء
قرآنا محبه .. إخاء

مكتوب فى كل كتاب

* * *

ظالم يسقينا سمه

دم ساييل ما بيهمه

يفرح دراكولا و عمه

ولا نعرف إيه الأسباب

* * *

ظالم عمره ما حيدوم

و لابد يجى له يوم

و بيان حق المظلوم

يرجع ويدق الباب

* * *

دمانا فى فلسطين

و عراقنا ليه حزين
حندافع مله و دين
شيوخ و بنات و شباب

* * *

ده احنا ف كل العصور
إسلامنا نور على نور
بيدافع عن المظلوم
و فروضه علوم و حساب

بِسْمِ اللَّهِ الرَّحْمَنِ الرَّحِيمِ

—

ألفين خساره عليك
لما تسوقك مره
كلمتها هي اللي تمشي
وانت اللي راجع ورا
الشورى دايمًا ليها
و تبوس كمان رجليها
قل لي كرامتك فين ؟
صبحت معاك مسخره ؟

* * *

يا عيني ع الكوسه
لما تفوق حدّها
عيني عينك بقت
ما تقدر تقف ضدها

لو مرّه تعمل فهلوی
و تبقی راجل و سوی
حتلقی دمک تقیل
مسخره و مش قدها

تعاريف

لقيتني
الواحد بالقاء تمانيه
و الساعه
تصبح ثانيه
و ناس
م السما جايه
أشكالهم غريبه على
قمر معدى - يمد حبه - يهدى
نجوم متنسعين فى الشوارع
زاحمين كل النواصي
كواكب طاييره فوق الأرض
بتزف عروسه ف عز البرد
و طير بيأدى الفرض

مطر بيرخ

عيال بيتنططوا و يغنوا

(يا مطره رخی رخی)

الورد ملم ورقاته

و دفن ريحته فى الطين

للمت طرف جلابيتى

تحت سنانى

(و الرجل تدب مطرح ما تحب)

(٢)

الشوارع ساكنها السكوت

يعلا صوتى فى السما

إنما .. أستخبي جواه

تعوى الديابه

تخبط شبابيك البيوت فى العتمه

ينكسر القزاز - يقع الشيش

فى الضلمه تكتر الخفافيش

أشجع روحى إثبتى ما تخافيش

لكنى انزعج م الخضه

يصحى خوفى ما بين ضلوعى

ارتعش جوه الهدمه اللى ساترانى

يطيرها الهوا لفوق .. تعرينى

تبان ضلوعى .. المتأله

يقع قلبى على أول سلمه

تشيلنى لسكه تانيه رجلى

لقيت قله على حيطه مايه

بـبوزها ناشف ع الشفايف

و لسان العطش لسه خايف

رفعتها ترويني

ملاقتنى ناس حوالى

رجعت أـجر جر فى رـجلى

دخلت جوه جلابيتى

أنده على الحارس

و انا قلبى حاسس

كل اللى شفته

كان وهم و هواجس



بمناسبة مرور خمسين عاماً
على تأميم قناة السويس

خمسين سنة عدوا علينا

خمسين سنه عدوا علينا
و مصر دايماً في عينينا
رافعين راياتك يا بلدا
يا قنال سويس أحلى مدينه
خمسين سنه عدوا علينا

* * *

يسلم قرارك يا معلم
تأميم قنالنا كان عيدنا
عدوان ثلاثي و لا نسلم
مفتاح قرارنا بقي ف إيدنا
و خير بلدا رجع لنا
خمسين سنه عدوا علينا

* * *

ع الميه ضحوا أجدادنا
حفروا قنالنا بأياديهم
و النصره رجعت لولادنا
و الفرحة رقصت فى عينيهم
و السمسيميه بتشجينا
خمسين سنه عدوا علينا

* * *

سفايينا رقصت م الفرحة
المرشدين و يا القباطين
و البمبوطيه عيون سارحه
وسط القنال رايعين جايين
يا بور سعيد و سويس غنى
و الإسماعيليه تهنى

قنالنا یفضل فی عینینا

خمسن سنه عدوا علینا

ياما احدى طعامتك

ياما احلى طعامتك يا زلابيه

يا لقمة القاضى يا داييه

بالسكر ولا بالشيره

أخذتى منا التأشيره

و قلوبنا فى حلاوتك داييه

* * *

فى عشائى ولا فطارى

أو ماشى ساعة عصارى

خفيفه يا ناس ع المعده

بشهاده من عم ابو سعده

دا حبيبى و ساكن جارى

* * *

تتقلبنى جوه الطاسه

ما انتِ الأصيله الحساسه

م الولعه تقولى آه يانا

و اخواتك دايره قلقانه

و عيون الناس دى بصاصه

* * *

بتلفى و يا المقصوصه

و تنطى نطه يا ننوسه

الزيت بيغازل فيكى

بيبوس يا حلوه على ايديكى

جوه القرطاس او مرصوصه

ياما احلى طعامتك يا زلابيه

يا لقمة القاضى يا دايبه



معلش أحنأ بنتعلم

أرحمنا يارب من التجار
كل يوم أسعارهم نار
خلو عقل الواحد طار
عايش أنا قلقان محتار
و بقيت قاعد و مبلم

* * *

رحت فى يوم أنا للجزار
أشترى لحمه أدانى ممبار
و لقيت عينه تطق شرار
لميت نفسى عملت فرار
قبل وشى ما يتخرشم

* * *

سبته و جريت ع الفكمانى

نفسی فی عنبه أو حیانی
وزن الکیس إزای غمانی
روح‌ت البیت و لقیته خیار
قالوا صحیح دانت معلم

* * *

صاحبی فرارجی شکله بسیط
رجل دوغری بس حویط
غش میزانه فاکرنی عبیط
صاحبی طلع تاجر مکار
فالح بس بیوس و یسلم

* * *

فران یتحکم فی الناس
یشخط و ینظر بلا احساس

لا عنده ضمير و لا أخلاص
عيشه كله زلط و دوبار
و الناس ساكنه ما تتكلم

* * *

صاحبى دخل غرفة أنعاش
كل مناه يداووه ببلاش
مش لاقين له دوا و لا شاش
لا حتى برشام فخار
و الجرح مخلية يتألم

* * *

أنا دورت فى كل مكان
فى صحارى و كمان عمران
مالقيتش أرخص م الإنسان

و ضميرنا فى زمانا أنهار

لسه لنا كتير و بنتعلم

* * *

مش راح يرجع سعر زمان

كانت العيشه رخيصة و كان

بيعايروا المش بفنجان

كمان الفول أبو زيت حار

معلش أحنا بنتعلم

۱۳۵

يا قاضى الغرام

يا قاضى الغرام
باشكيلك حبيبى
ظبطته فى المنام
بيحلم مش دارى بى
يا قاضى الغرام

* * *

بعث له أنذار
وكان على يد مُحضر
ما رد لى أعتبار
ولا قال حاجى يحضر
وسابنى للايام

* * *

ثابتة عليه الجناية

حبسوه جوه التخشيبه

عايز أدله كفاية

يسمع لكلام حبيبته

و ينفذ الأحكام

* * *

أترافع لى محامى

قارى فى الحب كتير

ولد حليوه و حامى

العاشق منه يغيير

و يدوب أى خصام

* * *

لو حكمك بعد مداولة

أفراج من بعد محاولة

خلاص سامحته يا قاضى
دنا قلبى بحبة أولى
يا قاضى الغرام

الفهرس

القصيدة	الصفحة
---------	--------

قراءة نقدية فى اللديوان	٤
صاحبى	١٦
خايف	٢٠
الطف بينا	٢٤
أمانى	٢٨
أحلام إنسان بسيط	٣٣
كعب داير	٣٦
ع الكورنيش	٤٠
مين الحمار .. ؟	٤٤
أهلاً بنايب دايرتنا	٤٨
ساعة الأذان	٥٢
ملحمة بلدنا	٥٦
مسرح ابو غريب	٦٢
حلوا يا حلوا	٦٨
فوانيس رمضان	٧٢

الفهرس

القصيدۃ	الصفحة
إلحقنا يا جدو	٨٠
يا مراكبى	٨٤
إلعب بعيد يا شاطر	٨٨
أول كدبه	٨٤
خبينى جوه قلبك	٩٢
ضربة جزاء	٩٦
أحبك كده	١٠٠
الوداع فارس العزه	١٠٤
يارب العالمين	١٠٨
عيب	١١٢
تخاريف	١١٦
خمسين سنه عدوا علينا	١٢٢
ياما احلى طعامتك	١٢٦
معلىش أحنأ بنتعلم	١٣٠
قاضى الغرام	١٣٦

أحمد رضا و انما ١٨٦٦-١٤/٧٤
شركة النشر للبرول - بيروت
الاداره العامه لتخطيط و توزيع

رقم الإيداع بدار الكتب

٢٠٠٦ / ١٥٩٤٧

I.S.B.N الدولي

977-374-0/53/2

دار الإسلام للطباعة والنشر

٠١٢٢٦١٤٣٦٣ - ٠٥٠ / ٢٢٦٦٢٢٠